

ZAPISNIK
O RADU TREĆE RADNE SJEDNICE SKUPŠTINE KANTONA SARAJEVO ODRŽANE
27.01.2023.GODINE SA POČETKOM RADA U 09,00 SATI

Treću radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici je prilikom otvaranja prisustvovala 31 zastupnica i zastupnik, a u daljnjem toku su se priključili i ostali, kako slijedi:

SDA - STRANKA DEMOKRATSKE AKCIJE

1. Dević Mahir
2. Izetbegović Sebija
3. Kalem Adi
4. Kapidžić Faruk
5. Selmanović Faruk
6. Viteškić Smiljana
7. Zahiragić Haris

POLITIČKA ORGANIZACIJA "NAROD I PRAVDA"

1. Ademović Kemal
2. Čampara Aljoša
3. Memić Arijana
4. Okerić Elvedin
5. Pobrić Rusmir
6. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čengiće Irfan
3. Čičić Davor
4. Magoda Kenan
5. Pekić Jelena
6. Stojanović Igor

POLITIČKA ORGANIZACIJA GRAĐANA "NAŠA STRANKA"

1. Bešlija Vildana
2. Handžić Vibor
3. Klarić Sanela
4. Melank Miomirka
5. Uk Nihad

STRANKA ZA BOSNU I HERCEGOVINU

1. Bandić Muamer

2. Gaković Elza
3. Gavrankapetanović-Smailbegović Fatima
4. Hodžić Admela
5. Šaljić Jasmin

DEMOKRATSKA FRONTA

1. Zuhrić Albin
2. Hašimbegović Marijela
3. Pilav Ilijaz
4. Vujović Vedrana

POLITIČKA ORGANIZACIJA/INICIJATIVA “ZA NOVE GENERACIJE”

1. Marjanović Damir

Izostanak sa ove sjednice opravdala je dopredsjedavajuća Danijela Kristić.

Nakon intoniranja državne himne, predsjedavajući je pozdravio zastupnice i zastupnike u Skupštini Kantona Sarajevo, članove Vlade Kantona Sarajevo, sve prisutne u sali, kao i predstavnike medija koji prate rad sjednice.

Na osnovu članova 72. i 73. Poslovnika Skupštine Kantona Sarajevo, Kolegij Skupštine Kantona Sarajevo je na sjednici održanoj dana 12.01.2023.godine utvrdio dnevni red, a isti je dopunio na sjednici Kolegija održanoj dana 23.01.2023. godine.

Prije nego što je stavio dnevni red na glasanje, predsjedavajući je predložio, zbog hitnosti realizacije, da se tačke 8. i 9. dnevnog reda prebace na mjesto tačaka 2. i 3. dnevnog reda i isto je predložio na izjašnjavanje zastupnicima.

Zastupnici su jednoglasno (30 „ZA“) prihvatili prijedlog predsjedavajućeg za zamjenu tačaka.

Potom je dao Dnevni red za Treću radnu sjednicu Skupštine Kantona Sarajevo, sa navedenom izmjenom, na izjašnjavanje i isti je usvojen jednoglasno (31 „ZA“) kako slijedi:

1. Poslanička/zastupnička pitanja inicijative i odgovori;
2. Prijedlog Odluke o davanju saglasnosti na Izmjene i dopune Finansijskog plana prihoda i izdataka Javne ustanove „Služba za zapošljavanje Kantona Sarajevo“ Sarajevo za 2022. godinu sa Odlukom o izvršavanju Izmjena i dopuna Finansijskog plana prihoda i izdataka Javne ustanove „Služba za zapošljavanje Kantona Sarajevo“ Sarajevo za 2022. godinu
3. Prijedlog Odluke o dopunama Odluke o usvajanju okvira za otkup imovine i naknade radi realizacije Projekta izgradnje gradskih saobraćajnica u Kantonu Sarajevo;
4. Prijedlog Zakona o izmjenama Zakona o šumama Kantona Sarajevo-skraćeni postupak;
5. Prijedlog Zakona o izmjeni Zakona o pružanju besplatne pravne pomoći-skraćeni postupak;
6. Prijedlog Zakona o izmjenama i dopuni Zakona o turizmu;
7. Prijedlog Zakona o komunalnoj policiji Kantona Sarajevo;
8. Prijedlog Zakona o uvjetima koje treba ispunjavati Kantonalna bolnica;

9. Nacrt Zakona o sportu Kantona Sarajevo;
10. Prijedlog Odluke o proglašenju temeljnih udruženja kulture naroda Bosne i Hercegovine od posebnog interesa za Kanton Sarajevo;
11. Prijedlog Odluke o davanju saglasnosti za zaključivanje Ugovora o poklonu između HOPE AND HOMES FOR CHILDREN Engleska, sa sjedištem u Sarajevu, ulica Himze Polovine br. 13 i Ministarstva za rad, socijalnu politiku, raseljena lica i izbjeglice Kantona Sarajevo, ulica Reisa Džemaludina Čauševića br. 1, kojim HOPE AND HOMES FOR CHILDREN Engleska poklanja nekretninu upisanu u Zemljišnoknjižnom uredu Općinskog suda u Sarajevu u ZK izvadku broj: 2994 K.O. SP_HRASNICA, k.č. 2876/98 u naravi stambena zgrada površine 95 m² i dvorište 215 m² ukupne površine 310 m², što odgovara upisu u katastarski operat PL broj: 1274 parcela broj 1942 K.O. Ilidža;
12. Prijedlog Odluke o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj (EBRD) za projekat „Tramvajska pruga Ilidža - Hrasnica“;
13. Prijedlog Odluke o izmjenama i dopunama Odluke o osnivanju Javne ustanove "Centar za napredne tehnologije u Sarajevu";
14. Nacrt privremene odluke o zaštiti izvorišta vode za piće "Sarajevsko polje".

Zastupnici su kao informativni materijal dobili:

- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec juni, za mjesec juli, zatim za mjesec januar – juni kvartalno, zatim za mjesec septembar, zatim za kvartal januar -septembar, pa za mjesec oktobar, za mjesec novembar 2022. godine;
- Informacija o provođenju Zakona o prijavljivanju i postupku provjere podataka o imovini nosioca javnih funkcija u Kantonu Sarajevo;
- Izvještaj Ministarstva finansija Kantona Sarajevo o poduzetim aktivnostima budžetskih korisnika po preporukama Ureda za reviziju institucija FBiH iz Konačnog izvještaja o finansijskoj reviziji Budžeta Kantona Sarajevo za 2021. godinu, broj: 08-11-1446-170-1 od 30.11.2022. godine;
- Izvještaj o razvoju Kantona Sarajevo za 2021. godinu;

TOK SJEDNICE

Prije prelaska na realizaciju dnevnog prve tačke dnevnog reda, predsjedavajući je napomenuo zastupnike da vode računa o vremenu određenom za ovu tačku, obzirom da je zakazana sjednica Doma naroda kojoj zastupnici iz Kantona Sarajevo trebaju prisustvovati.

AD – 1.

POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je otvorio tačku i dao riječ zastupnicima.

Zastupnik Mahir Dević je podnio sljedeće (citiramo): „U skladu sa članom 121 Poslovnika o radu Skupštine Kantona Sarajevo ispred Kluba Stranke demokratske akcije za današnju sjednicu predlažemo sljedeću deklaraciju:

Skupština Kantona Sarajevo kao predstavničko tijelo Kantona u čijem sastavu glavni grad koji je bio 1425 dana pod opsadom izražava zabrinutost i najoštrije osuđuje provokativno podizanje 3 prsta od strane novoizabranog ministra sigurnosti države Bosne i Hercegovine, Nenada Nešića ispred sjedišta institucija Bosne i Hercegovine, što je ponovio i u programu uživo na javnom

servisu Federalne televizije. Podsjećamo na činjenicu da su najstrašnji zločini koji su počinjeni za vrijeme agresije na Bosnu i Hercegovinu a koji su kulminirali zločinom genocida, kao četverogodišnja opsada Sarajeva i teroriziranje njegovih građana počinjeni upravo uz upotrebu simbola podignuta 3 prsta što je i dokazano brojnim sudskim presudama Međunarodnog suda za ratne zločine počinje na području bivše Jugoslavije. Podizanje 3 prsta ispred zgrade institucija Bosne i Hercegovine, blizu mjesta na kojem su pale prve žrtve okupacije Sarajeva od strane ministra sigurnosti Bosne i Hercegovine Nenada Nešića predstavlja provokaciju i svjesnu uvredu za sve žrtve agresije i zločina genocida, te ima za cilj narušavanje odnosa i destabilizaciju povjerenje između građana i naroda Bosne i Hercegovine, kao i kreiranja atmosfere straha. U tom smislu navedeno ponašanje najoštrije osuđujemo. Navedenu deklaraciju ću proslijediti naravno sekretaru Skupštine Kantona Sarajevo i očekujem da se Skupština o istoj izjasni.“.

Zastupnik Damir Marjanović je podnio sljedeće (citiramo): „Imam 2 pitanja i 1 inicijativu. Prvo pitanje se odnosi za Ministarstvo za visoko obrazovanje nauku i mlade. Kontaktiran sam kao predsjedavajući Skupštinske komisije vezano za obrazovanje i nauku glede problema koji je nastao prilikom realizacije i poštivanja Zakona o visokom obrazovanju, tiče se tačke koja se odnosi na to da će svi samofinansirajući studenti koji imaju prosjek preko 8,0 biti oslobođeni plaćanja. Neki od fakulteta su već naplatili prve rate i dužni su da vrate sada taj novac. Imamo informaciju da je došlo do zastoja u tom principu, pa molim ministricu pismeno da odgovori na to pitanje da bih to pitanje mogao proslijediti onima koji su. Zanima me što je Ministarstvo uradilo? Što je Rektorat uradio? Između ostalog da zatraži informaciju kako da se riješite taj problem i da li će se studentima vratiti taj novac? Ako neće tko je odgovoran? Pretpostavljam i siguran samo u vas ministrice. Za Ministarstvo za odgoj i obrazovanje pitanje koje se tiče kurikularne reforme. Ukratko dobio sam isto upiti kao predsjedavajući komisije vezano za kurikularnu reformu. Zahtijeva se imena ljudi koji su radili na kurikulumima, koliki su im bili honorari, da li su ti timovi komisije za izradu akata nastavili da rade, koliko grupa, timova radi na svemu tome. Znači isto je pitanje došlo meni kao predsjedavajućem zato zbog dužine ovog izlaganja neću čitati sve detalje, dostaviti ću pismeno. I zamolit ću da mi se odgovori u što kraćem roku da bi ljudima i javnosti mogli da odgovorimo na ovo pitanja. E, sada vezano za inicijativu. Često smo u protekle 4 godine imali priliku da slušamo različite inicijative koje su na neki način podrazumijevale određena finansijska prebacivanja, pomaganja, ulaganja. Prošle sjednice smo imali jednu sličnu inicijativu vezano za onih famoznih 1080 konvertibilnih maraka, pa često smo prilikom tih inicijativa imali probleme tehničke prirode nedostatka vremena da se to realizira, izjašnjavanje, neizjašnjavanje Vlade i tako dalje. Tako da se ponekad i pored dobre volje zbog procedura nešto se nije moglo uraditi. Evo sada na vrijeme da započnemo jednu inicijativu. Svi ste svjesni da u 2023. godine priprema nam se budžet u Kantonu Sarajevo u koji će biti manje i nego što je bio za 22. Znači u 2023 će biti znatno manji, da smo jedan od rijetkih kantona koji će imati taj manji Budžet i već u Nacrtu budžeta koji ćemo raspravljati uskoro za nekih par dana vidjeli ste da mnoge institucije će imati smanjena smanjena izdavanja tj. smanjenu mogućnost troškova. S obzirom da su stranke u Kantonu Sarajevo isto dijelom finansiraju iz Budžeta Kantona Sarajevo ovoga momenta pokrećem inicijativu da se Skupština Kantona Sarajevo izjasni da u Budžetu za 2023. godinu, znači mi kao zastupnici pokrenemo inicijativu prema Vladi da se izdvajanja za stranke koje participiraju u Skupštini KS smanje za najmanje 50 %. Neću tražiti izjašnjavanje o inicijativi sada zato što poštujem kolege i kolegice i poštujem da se moraju konsultovati sa svojim rukovodstvima, ali evo odmah najavljujem da će biti jedan takav amandman i kod Nacrta budžeta i bio bih presretan kada bi svi zauzeli taj stav da pokažemo da

stranke u Kantonu Sarajevo zajedno će podnijeti sa ostalim institucijama teret smanjena ovog Budžeta“.

Zastupnica Fatima Gavrankapetanović-Smailbegović je podnijela sljedeće (citiramo):

„Poštovani predsjedavajući, kolege zastupnici, članovi Vlade, moje današnje pitanje bi bilo problemi liste čekanja na zdravstvene usluge u Kantonu Sarajevo. Na prošloj sjednici Skupštine Kantona pokrenula sam jednu vrlo konkretnu inicijativu za rješavanje problema liste čekanja na određene zdravstvene usluge u Kantonu Sarajevo. Nakon moje inicijative javlja se veliki broj sugrađana koji ukazuju da su na listama čekanja i da je stanje i dalje vrlo složeno.

Nisam dobila nikakav odgovor na moja pitanja od resornog Ministarstva zdravlja zato ovaj put ponavljam suštinu onoga što sam izložila na prethodnoj sjednici. Tražim od Ministarstva zdravlja i ministra zdravlja odgovor na sljedeća pitanja: da li su u Kantonu Sarajevo riješene liste čekanja, i ako jesu, kako i na koji način? Tražim da se u usmenom odgovoru detaljno pojašni kako su liste riješene liste čekanja na preglede za dijagnostičke metode i operativne zahvate? Kakva su iskustva sa terena, kako ova pitanja funkcionišu u praksi i da li Ministarstvo zdravlja ima primjedbe i prigovore pacijenata na liste čekanja? Pored usmenog odgovora tražim detaljan pismeni odgovor do sljedeće sjednice Skupštine i očekujem naravno rješavanje inicijative koju sam po predmetnom pitanju postavila na prethodnoj sjednici.“

Zastupnik Kenan Magoda je podnio sljedeće (citiramo):

„Zastupnička inicijativa u ime Kluba zastupnika SDP-a Kantona Sarajevo prema Skupštini Kantona Sarajevo za nastavak dijaloga Vlade Kantona Sarajevo i sindikata o načinu povećanja primanja radnika koji ta primanja ostvaruju iz Budžeta Kantona Sarajevo u 2023. godini. Pozdravljamo činjenicu da je Vlada Kantona Sarajevo u Nacrtu budžeta Kantona Sarajevo za 2023 godinu osigurala novčana sredstva u iznosu većem od 25 000 000 KM za povećanje primanja radnika iz Budžeta Kantona Sarajevo u 2023. godini. Posebno je ova činjenica još značajnija kada se uzme u obzir da je Budžet značajno umanjen zbog primjene izmjena i dopuna Zakona o raspodjeli javnih prihoda Federacije Bosne i Hercegovine. Također pozivamo Vladu Kantona Sarajevo, te predstavnike sindikalnih organizacija da u dobroj vjeri nastave pregovore o modelima i načinu povećanja primanja radnika koji primaju, i to je koji primanja ostvaruju putem Budžeta Kantona Sarajevo. Utvrđivanjem Nacrta budžeta će se stvoriti jasan pregovarački tim i okvir za povećanje primanja, te u toku javne rasprave o istom otvoriti mogućnost dostavljanja sugestija, prijedloga i primjedbi na isti. Ovom inicijativom Skupština Kantona Sarajevo nalaže Vladi Kantona Sarajevo za nastavak dijaloga sa sindikatima o njihovim zahtjevima. Skupština Kantona Sarajevo poziva sindikate da prihvate činjenicu da je ovo već druga godina u kojoj Vlada Kantona Sarajevo povećava plate uprkos smanjenim budžetskim sredstvima zbog entitetskih zakona i imaju razumijevanja prema drugim korisnicima budžet i korisnici Budžeta i potrebama građana Kantona Sarajevo koji ne primaju platu iz Budžeta kantona Sarajevo a koji svi zajedno ustvari punimo u skladu sa zakonodavnim okvirima“.

Zastupnik Faruk Kapidžić je podnio sljedeće (citiramo):

„Imam jedno pitanje i jednu inicijativu. Dakle pitanje je za Ministarstvo komunalne privrede, infrastrukture i prostornog uređenja itd. i čitave Vlade što je poduzela i šta je uradila za nelegalni odnosno nelegalnu dozvolu za objekat pumpe i hotela i skladišta kerozina kod aerodroma i objekta na Soukbunaru, mislim da je to broj 36 do do rezervoara vodovoda, obzirom da se radi o ugrožavanju zdravlja i sigurnosti ljudi i građana. Obzirom da vjerovatno ne možemo dobiti odgovor ni od Vlade ni od resornog Ministarstva pokrećem inicijativu gdje se zadužuje Vlada Kantona Sarajevo da pripremi i u parlamentarnu proceduru uputi izmjene i dopune Zakona o organizaciji i djelokrugu organa uprave i upravnih organizacije u Kantonu Sarajevo i to na način da se Ministarstvo komunalne privrede infrastrukture i prostornog uređenja građenja i zaštite okoliša preimenuje u Ministarstvo prostornog uređenja, građenja i zaštite okoliša, te u skladu s tim da se promijene njegove nadležnosti a da se komunalna infrastrukture i komunalna privreda dodaju u nadležnosti

Ministarstva saobraćaja i Ministarstva privrede, tim redom. Obrazloženje: izmjenama i dopunama Zakona o organizaciji i djelokrugu organa uprave i upravnih organizacija u Kantonu Sarajevo koji je više puta osporavan pred Ustavnim sudom Federacije Bosne i Hercegovine, Ministarstvo prostornog uređenja, građenja i zaštite okoliša spojeno je sa Ministarstvom komunalne privrede i infrastrukture. S obzirom na činjenicu da to novo Ministarstvo komunalne privrede, infrastrukture i prostornog uređenja građenja i zaštite okoliša u protekle 2 godine koliko egzistira nije uspjela adekvatno odgovoriti propisanim nadležnostima i obavezama, a radi velikog obima nespojivih poslova koji su mu predmetnim zakonom povjereni, smatram neophodnim vratiti Ministarstvo prostornog uređenja, građenja i zaštite okoliša u okviru nadležnosti koje imalo do 2021. godine. Nadležno za komunalnu infrastrukturu a radi srodnosti i kompatibilnosti poslova najbolje bi bilo propisati i dodijeliti Ministarstvu saobraćaja koje je de facto Ministarstvo saobraćajne infrastrukture, te kao takvo srodnog komunalnoj infrastrukturi, a komunalnu privredu Ministarstvu privrede. Kratko samo pojašnjenje da da možda to izgleda ovako ovako malo za ovo spajanje saobraćaja, ja sam to dao rješenje, samo je bitno da se razdvoji ovo Ministarstvo koje toliko veliko da za diskusiju dok pročitate ime izgubite vrijeme za diskusiju.“.

Zastupnik Adi Kalem je podnio sljedeće (citiramo): „Naime pokrećem jednu inicijativu a tiče se produženja linije voza na relaciji Sarajevo -Pazarić - Raštelica. Zaključak svakako da se zaduži Vlada Kantona Sarajevo i Ministarstvo saobraćaja Kantona Sarajevo da u suradnji sa Javnim preduzećem Željeznice Federacije BiH d.o.o. Sarajevo i naravno u cilju poboljšanja javnog prijevoza putnika u Kantonu Sarajevo u što kraćem roku obezbijedi produženje putničke linije voza Sarajevo -Pazarić - Raštelica kako bi građani općine Hadžići imali bolju uslugu javnog prijevoza putnika i redovniji prijevoz. Naime, nakon više obraćanja građana sa područja Tarčina i Raštelice i službenog dopisa od 16.01.2023.godine Ministarstvu saobraćaja Kantona Sarajevo i Javnom preduzeću Željeznice Federacije BiH predsjednika mjesne zajednice Raštelica, gospodina Almira Husanovića, neophodno je da Vlada produži pomenutu liniju. Svi znate da se radi o kraju Kantona i populaciji građana koja često koristi javni prijevoz, te zbog neredovnost autobusnog saobraćaja, pogotovo u zadnje vrijeme, na saobraća autobus Ilidža -Tarčin- Vukovići i stoga je neophodno unaprijediti mogućnost izbora prilikom odabira javnog prijevoza putnika građanima općine Hadžići. Također moram napomenuti da su se nakon izgradnje dionice autoputa Tarčin-Ivan sedlo i puštanja iste u promet, stvorili svi preduvjeti da se stanica u Raštelici koristi u punom kapacitetu i također u sklopu ove inicijative zamolio bih, opet na zahtjev građana općine Hadžići, novo stajalište u naselju Krupa i obnovi stajalište u Lukama, odnosno Sivicama, kako bi građani nesmetano ulazili i izlazili iz vozila. Naravno zamolit ću da se Skupština Kantona Sarajevo izjasni po ovoj inicijativi. Svjestan sam da ova inicijativa iziskuje određena finansijska sredstva pa ako ne može se stići da se Vlada izjasni po ovoj inicijativi, možda na narednoj sjednici da glasamo na Skupštini.“.

Zastupnica Admela Hodžić je podnijela sljedeće (citiramo): „Evo upravo jedno od mojih pitanja danas je bilo ovo što je sada kolega Adi tražio inicijativom. Mi smo zaključak usvojili prije godinu dana za produženje funkcionisanja linije Željeznica Federacije od Sarajeva do Raštelice da to ne bude do Pazarića nego do Raštelice i usvojili smo ovdje jednoglasno taj zaključak, međutim još nije realizovan. Evo samo da pitamo zašto nije? I naravno želim da se usvoji ova inicijativa kolege Adija.

Ja danas imam još 2 pitanja i 2 inicijative. Neću čitati obrazloženja zbog vremena koje, moramo imati ovaj obzira prema svim kolegama. Pokrećem inicijativu prema Vladi Kantona Sarajevo da se što kraćem vremenskom periodu izdvoje sredstva u iznosu od 200 000 KM za pomoć općini Hadžići koju je u proteklom periodu zadesilo veliko nevrijeme usljed čega su u kratkom vremenskom periodu bujične poplave nanijele znatnu materijalnu štetu lokalnom stanovništvu Tarčina i dijelom Pazarića, te da se novčana sredstva usmjere za rekonstrukciju i sanaciju lokalnih potoka, potpornih zidova, putne infrastrukture, kao i nastale materijalne štete građanima na ovaj privatnim posjedima.

Također pokrećem inicijativu prema Vladi Kantona Sarajevo da u narednom periodu planira i izdvoji sredstva za općinu Hadžići a koja će se koristiti za stavljanje u funkciju silosa u Tarčinu, te da se također sredstva planiraju za sljedeću sijnu sezonu za poljoprivrednike Kantona Sarajevo i kreiraju programi pomoći koji žele isključivo zasijati žitarice u ovoj sijnoj u sezoni.

Postavljam pitanje premijeru Kantona Sarajevo gospodinu Forti da nas izvijesti o rezultatima provedenih aktivnosti o inicijativi kojom smo prije 6 mjeseci tražili od Vlade Kantona Sarajevo da poduzme sve potrebne aktivnosti kako bi se provela anketa u kojoj bi učestvovala osobe sa invaliditetom Kantona Sarajevo sa jedne strane gdje bi unijeli podatke o obrazovanju, stepenu invalidnosti, koje poslove mogu obavljati i mjesečnim primanjima i sa druge strane prikupili podaci iz Ministarstva javnih preduzeća i javnih ustanova Kantona Sarajevo o svakom 16. radnom mjesto koje osobe sa invaliditetom sljedeće po Zakonu i koje bi mogle obavljati u tim javnim organizacijama. Radna mjesta kao što su operateri na telefonskim centralama, mjesta fizioterapeutskih tehničara, mjesta za unos i obradu podataka za invalidne osobe, a naročito za slijepa i slabovidne osobe i sva radna mjesta za koja se osobe sa invaliditetom anketom izjasne da bi mogli obavljati u skladu sa svojim obrazovanjem i sposobnostima, te da javne organizacije Kantona Sarajevo označe kao radna mjesta za koja prioritet pri zapošljavanju nakon ispunjenih uopćih i posebnih uslova imaju osobe sa invaliditetom“.

Zastupnica Elza Gaković je podnijela sljedeće (citiramo): „Moju današnju inicijativu upućujem Ministarstvu privrede Kantona Sarajevo i Ministarstvu za nauku, visoko obrazovanje i mlade Kantona Sarajevo. Posljednji slučajevi zaraze studenata Veterinarskog fakulteta u Sarajevu Q groznicom nameću jedan temeljitiji rad i pripremu farmi za praktičnu nastavu studenata Veterinarskog fakulteta u Sarajevu. Pitanje koje postavljam i tražim usmeni odgovor ministra privrede je sljedeće: da li je rađena analiza zaraznih bolesti zoonoza životinja na PD Butmir i ostalim farmama na kojim studenti obavljaju praktičnu nastavu? Ako je rađena analiza, ko je radio tu analizu i kojima metodama je analiza rađena? Koliko često se na godišnjem nivou radi analiza životinja na zarazna oboljenja PD Butmir i na ostalim farmama? I da li je inspektorat Veterinarske inspekcije Kantona Sarajevo izvršio pregled životinja na PD Butmir? I ukoliko je izvršen zamolit ću da mi se dostavi zapisnik. Inicijativu koju postavljam, obrazloženje Q groznica kod ljudi dovodi do teških oboljenja centralnog nervnog sistema, trajnih oštećenja srca i steriliteta. U cilju zaštite studenata Veterinarskog fakulteta u Sarajevu podnosim inicijativu, obzirom da su Budžetom Ministarstva privrede Kantona Sarajevo predviđena finansijska sredstva u 2022. u iznosu od 500 000 konvertibilnih maraka za namjenu veterinarsko zdravstvenih pregleda i kontrole podnosim inicijativu da se vrše obavezne godišnje analize životinja u cilju sprečavanja, otkrivanja, kontrole i suzbijanja zaraznih i parazitarne bolesti i da tek nakon dostavljene potvrde farmi na kojima se realizira praktična nastava prema Veterinarskom fakultetu u Sarajevu o negativnim uzorcima na zoonoze i druge zarazne bolesti studenti se tek tada mogu slati na praktičnu nastavu. U okviru ovoga podnosim inicijativu za kupovinu jednokratne zaštitne opreme za studente Veterinarskog fakulteta u Sarajevu koja je neophodna kao uslov za sigurnu zaštitu na određenim praktičnim vježbama.“.

Zastupnica Marijela Hašimbegović je podnijela sljedeće (citiramo): „Za današnju sjednicu pripremila sam 2 pitanja i jednu inicijativu i obzirom na ograničeno vrijeme prezentirat ću samo ovu inicijativu. Obraćam se Vladi Kantona Sarajevo. Podnosim inicijativu da se projektu Mala scena Narodnog pozorišta sa radionicama i sa smještajnim kapacitetima koji je bio dijelom programa javnih investicija Kantona Sarajevo za period 2018-2020. godina vrati isti status ili da se kroz druge povoljne prilike riješi akutno otvoreno pitanje koje se prevashodno odnosi na sigurnost havarisanog objekta radionica JU Narodno pozorište. Ovaj objekat se nalazi u ulici Terezije 52 Skenderija i njegova trenutna namjena su usluge izrade i skladištenje scenografije JU Narodnog pozorišta. Sigurnost ovog objekta je ugrožena rade klizišta koje se nalazi neposredno uz objekat i stanje se dodatno pogoršala nakon izgradnje novih objekata iznad ove lokacije. U objektu radionica nalazi se plinsko postrojenje za grijanje koje dodatno predstavlja ozbiljnu prijetnju jer klizište svojim stalnim radom ostavlja vidljive

tragove na zidovima, podovima, plafonima, potpornim zidovima i vrši fizičko ugrožavanje objekta općenito. Do sada su 2 inspeksijska nalaza stavila u fokus alarmantno lošu sigurnosnu situaciju ovog objekta. Do danas osim izrade idejnog rješenja novog objekta i izmjene Regulacionog plana Podgaj-Tekija nije bilo drugih aktivnosti. Plan budućih aktivnosti prevashodno se odnosi na privremeno izmještanje radionica na drugu lokaciju koja je adekvatna za izvršenje poslova izrade i skladištenje scenografija, a sve u skladu sa stručnim zahtjevima kvadrature i visina prostora, stepen vlage i slično, udaljenost od Pozorišta radi svakodnevnog transporta kamionom. Ovaj privremeni prostor može služiti i za povremeno igranje predstava i biti u funkciji prostora male scene. Nakon izmještanje sljedeće aktivnosti su rušenje havarisanog objekta u sve druge predradnje urbanističku i građevinsku dozvolu i druge planske dokumente. U posjedu ovog zemljišta gdje se nalazi objekat upisani su JU Narodno pozorište i fizičko lice koje posjeduje jedan manji dio rubnog dijela lokacije. Potrebno je planirati pravne radnje radi povrata ovog dijela zemljišta u posjed JU Narodnog pozorišta. Urađeno idejno rješenje novog objekta koristi vertikalne mogućnosti u smislu iskoristivosti prostora za druge namjene koje su neophodne pozorištu i potrebama kulture općenito. Novi objekat je osmišljen na način da se u suterenu zadrži prostor za radionice i fundus scenografija a vertikalno su planirani prostori male scene i u gornjoj zoni smještajni kapaciteti za gostujuće umjetnike pozorišta. Trenutno za ovaj smještaj izdvajaju se velika sredstva, hoteli ili privatni smještaj. Prostor Male scene projektovan je sa istim dimenzijama kao i velika pozornica JU Narodno pozorište kapaciteta od 250 sjedišta. Višestruke su vrijednosti ovog projekta, a tiču se stvaranje boljih uslova za rad, rasterećenje rada na velikoj pozornici, aktivnosti 3 umjetnička ansambla, najam sale, festivali, gostujuće predstave i slično, bolje uslove rada u radionicama, uštede u smislu smještaja gostujućih umjetnika i svakako veliki doprinos u bogatijoj kulturnoj sceni Bosne i Hercegovine. Ulaganjem u kulturu ulažemo u kulturni kapital koji akumulira sve kulturne vrijednosti. Mjere sigurnosti su primarne i u ovom trenutku ozbiljno ugrožavaju živote uposlenika, kao i živote svih drugih koji žive i rade u neposrednoj blizini. Molim vas da krajnje ozbiljno prihvatite ovu inicijativu i pokrenete sve dalje aktivnosti definirane metodologijom projekata koji su dio programa javnih investicija ili drugih povoljnih prilika koje će donijeti rješenje za ovakvu situaciju.“.

Zastupnica Jelena Pekić je podnijela sljedeće (citiramo): „Naime moje pitanje zastupničke je upućeno prema Ministarstvu pravde i uprave Kantona Sarajevo. Pitanje glasi zašto nije predložen Zakon o lokalnoj samoupravi Kantona Sarajevo u skladu Zakonom principima lokalne samouprave u Federaciji Bosne i Hercegovine i Programom rada Vlade Kantona Sarajevo za period. 2022. godine. Navedeni zakon treba da prethodi izrada novih amandmana na Ustav Kantona Sarajevo jer je implementacija amandmana na Ustav Kantona iz 2017. godine u praksi predstavljala problem, veliki izazov naročito Gradu Sarajevo i općinama koje čine Grad Sarajevo. Za postavljanje ovog pitanja me inspirisala sjednica Gradskog vijeća Grada Sarajevo, održana ove sedmice, a gdje je usvojen novi Statut Grada Sarajeva nakon 15 godina, što je zaista pohvalno za trenutno rukovodstvo Grada Sarajeva. To je bilo moje pitanje. I još samo ću nadopuniti inicijativu koju je prezentovao kolega Magoda u ime Kluba SDP-a da tražimo izjašnjenje Skupštine o istoj, a budući da ista ne podrazumijeva izjašnjenje Vlade Kantonu Sarajevo, tako da se može postupiti izjašnjenju od strane Skupštine.“.

Zastupnik Faruk Selmanović je podnio sljedeće (citiramo): „ja imam 2 pitanja i oba se odnose za Ministarstvo za socijalnu politiku Kantona Sarajevo. Molim da nam se usmeno objasni zbog čega je i na osnovu kojeg zakonskog propusta obustava, urađena obustava isplate naknade za određen broj porodilja u Kantonu Sarajevo iako imaju izdata i važeća rješenja. I da nam se pojasni zbog čega je izvršena obustava isplate naknadu za porodice sa troje i više djece gdje roditelji ne žive na istoj adresi ili nisu prijavljeni na istoj adresi. Hvala. Usmeno, usmeno naravno“.

Zastupnica Sanela Klarić je podnijela sljedeće (citiramo): „Ja sam poslala u proceduru pismeno 2 inicijative a prema Ministarstvu privrede i razgovarala sam za ministrom o ovome. Radi se

o tome da mi imamo žene i sugrađane koji su mali mikro uzgajivači povrća i voća i proizvoda od prirodnih materijala koji nemaju adekvatne mjesta za prodaju svojih ličnih proizvoda i tražim da se umjesto da oni na nekim improvizovanim kutijama i prodaju svoje proizvode i bježe od policije, da ih organizujemo u tradicionalne bazara, a gdje bi mogli na dostojanstven način, organizovano brendirano, kao što je to urađeno u Zagrebu, biti kao što je urađeno u Zagrebu gdje su oni brendirali te žene kao "kumice", a mi to možemo uraditi pod imenom "hanimice" i dati dostojanstvo tim poljoprivrednim proizvođačima. S druge strane četiri godine sam na federalnom nivou insistirala na boljoj inspekciji, posebno kada govorimo o poljoprivredi i poticajima u poljoprivredi i smatram da je važno da na kantonalnom nivou hitno izmijenimo Pravilnik o unutrašnjoj organizaciji Kantonalne uprave za inspeksijske poslove, te da izvrši hitno upošljavanje poljoprivrednih inspektora, ali na način da sa 3 povećamo na 4 i da svakako pazimo na sektore u poljoprivredi jer ne možemo samo ovaj kontrolisati uzgajivače recimo voća i povrća, moramo imati inspektore koji su stručni ako govorimo o stočarstvu i drugim a ovim oblastima. Takođe iz opštine Ilijaš, to nisam poslala pismeno, ali pripremam, su me zamolili, jer je izgrađen ova željeznička stanica i ona se nalazi na takvom mjestu da pješaci da bi došli do te željezničke stanice moraju prekršiti veliki broj propisa i zabrana i imali smo situaciju da je jedna djevojčica poginula prošle godine . Molim Ministarstvo saobraćaja da se hitno reaguje da se uradi zebra i smanji i napravi ograničenje saobraćaja, a u budućnosti da se planira da se vrati pasarela koja je postojala u Ilijašu. Sve ove inicijative ću pa poslati i u obliku amandmana na Budžet.

Zastupnica Vedrana Vujović je podnijela sljedeće (citiramo): „Danas imam jedno zastupničko pitanje koje upućujem Ministarstvu za rad, socijalnu politiku, raseljena lica i izbjeglice Kantona Sarajevo odnosno resornoj ministrici Prvulović, koje glasi: da li i u kojem obimu Ministarstvo radi na tome da građanima Kantona Sarajevo, a posebno korisnicima prava i usluga Ministarstva i ustanova po njegovom ingerencijom poboljša pristupačnost? Pristupačnost se u ovom smislu najprije odnosi na fizički pristup institucijama i ustanovama kojima se prevashodno osobe sa invaliditetom ostvaruju prava propisana zakonom, a sami ulazi u zgrade su na nepristupačni. Dalje u smislu pristupačnosti informacijama o načinima ostvarivanja prava i obaveza, da li je u planu efikasnija komunikacija sa građanima, kao i poboljšanje uslova rada i kapaciteta odnosno zaposlenih u javnim ustanovama odnosno institucijama koje su pod ingerencijom resornog Ministarstva? Odgovor očekujem u usmenoj formi a ukoliko bude bilo potrebe može i pismeno na službeni e-mail.“.

Zastupnik Muamer Bandić je podnio sljedeće (citiramo): „Ja imam, dakle na osnovu člana 106 a u vezi sa članom 112, 213 Poslovnika Skupštine Kantona Sarajevo pokrećem zastupničku inicijativu prema Vladi Kantona Sarajevo. Zadužuje se Vlada Kantona Sarajevo i Ministarstvo odgoja i obrazovanja da izmjeni i dopuni nastavni plan i program za predmet historija, povijest za deveti razred. Činjenica je da generacija učenika od završetka rata i agresije na Republiku Bosnu i Hercegovinu nisu imali priliku da na adekvatan sistemski način u neophodnoj mjeri izučavaju noviju historiju naše zemlje. Također je činjenica da su o historiji Bosne i Hercegovine u proteklim godinama više učili učenici u Kanadi, Velikoj Britaniji i Hrvatskoj od naših učenika i zato je krajnje vrijeme da se sada u Kantonu Sarajevo izmjeni i dopuni nastavni plan i program za deveti razred iz predmeta historija /povijest. Adekvatnom izmjenom nastavnog plana programa bio bi jedan od načina suprostavljanja zaboravu kao strateškom cilju onih koji su počinili agresiju u periodu 1992- 95. godine. Ovo bi bio jedan ogroman iskorak da relevantnim činjenicama odnosno dokazima prikažemo stanje onakvim kakvo je ono bilo, bez bilo kakvog pokušaja devalviranja prošlosti i unošenja neistine u sam proces događaja od 99 do 95. godine. Ove izmjene bi trebale obuhvatiti teme vezane za disoluciju Jugoslavije, međunarodno priznanje Republike Bosne i Hercegovine ,agresiju na našu zemlju, otpor odbrambeno oslobodilačkih snaga i formiranje Armije Republike Bosni i Hercegovini, opsadu Sarajeva i drugih bh gradova, kao i planove o podjeli Republike Bosne i Hercegovini , Dejtonski mirovni sporazum, te okončanje agresije. Također treba uvrstiti uništavanje kulturno historijskog blaga odnosno pravoslavnih, katoličkih, islamskih i jevrejskih objekata. Posebno treba obraditi činjenicu da su svi vjerski objekti Bošnjaka na prostoru RS-a bili uništeni , a mezarja čak i prerovana i na njima su građani

parkinzi, stočne pijace i slično. Cilj agresora je bio da se zatre svaki vid prisustva Bošnjaka na ovim prostorima. Smatram da bi kroz 30 % izmijenjenog nastavnog plana i programa u budućem radu nastavnika sa učenicima bilo omogućeno da na adekvatan način pojasne šta se dešavalo tokom agresije na Bosnu i Hercegovinu prikazivanjem dokumentarnih filmova, prezentacijama referata sa relevantnih naučnih skupova, posjetama značajnim historijskim mjestima. Izmijenjeni sadržaj isključilo bi se temeljio na utvrđenim historijskim činjenicama, na zvaničnim dokumentima, relevantnim publikacijama i nespornim presudama dostupnim i prihvaćenim u cijelom civiliziranom svijetu. Kao pozitivan primjer ističem da je Tuzlanski kanton na sistematski način riješio oblasti izučavanja novije historije sa akcentom na period agresije. Nastavni plan i program je izmijenjen a učenici devetog razreda osnovne škole dobili su dodatak udžbenika o ratnoj historiji Bosne i Hercegovine koji je izašao iz štampe. Smatram da je ovo minimum minimuma kako naši sadašnji i budući učenici trebaju izučavati historijske činjenice o agresiji na Bosnu i Hercegovinu. Također smatram da je ovo naša dužnost i obaveza prema učenicima i braniocima Bosne i Hercegovine od agresije koji su dali svoje živote i dijelove tijela, kao i preživjelim braniocima“.

Zastupnica Sebija Izetbegović je podnijela sljedeće (citiramo): „Ja imam 2 pitanja i imam jednu inicijativu i zahtjev. Dakle prvo pitanje je prema Vladi Kantona Sarajevo. Nedavno sam uputila i pisanu inicijativu i zahtjev da nam napokon odgovorite na desetine zahtjeva za prijem nedostajućeg kadra u Klinički centar Univerziteta u Sarajevu. Biološko znanje kadra je neophodno, uposlenici odlaze u penziju, neki umiru, odlaze u inostranstvo, s čim se bore sve zemlje okruženja, međutim od vas nema nikakvog odgovora niti niti nam dajete mogućnost da zaposlimo mlade kadrove „specijaliste koji su u međuvremenu završili specijalizaciju u koju smo uložili mnogo materijalnih sredstava i energije. To je prvo. Dakle poslali smo vam najmanje 12 urgencija sa mojom inicijativom, to je 13 ukupno. Drugo pitanje za Ministarstvo zdravlja. Zbog čega nikad nije uspostavljen put pacijenta u Kantonu Sarajevo i zbog čega pacijenti ne znaju kako trebaju jednostavno i efikasno da se kreću kroz zdravstveni sistem? Zahtijevamo hitan odgovor Ministarstva zdravlja. I još jedan zahtjev, odnosno inicijativa je da Ministarstvo zdravlja hitno dostavi elaborat o trenutnom stanju zdravstvenih ustanova u Kantonu Sarajevo, nacrt razvoja zdravstva u Kantonu Sarajevo što podrazumijeva snimak svih zdravstvenih ustanova Kantona Sarajevo sa postojećim kadrom i opremom i uputu o tome za šta i koju djelatnost su navedene ustanove registrovane . Također zahtijevam da se dostavi spisak svih uposlenika zdravstvenih ustanova koji se finansiraju iz budžeta Kantona Sarajevo a istovremeno rade i privatno. Želimo vidjeti i usporediti koliki je, kolike su liste čekanja u ustanovama u kojem veliki broj uposlenika u popodnevnim satima angažovan u svojim privatnim ordinacijama.“.

Zastupnik Samir Avdić je podnio sljedeće (citiramo): „Već nekoliko puta na sjednicama mogli smo čuti kolege i kolegice koji se žale i da ne dobijaju odgovore na svoje na svoja pitanja, na inicijative ovaj pa tako ukoliko mi kao zastupnici ne dobijamo odgovor možemo samo zamisliti u kakvoj tek situaciji se nalaze udruženja građana i itd. Jučer smo dobili ovaj jednu da kažemo žalbu od Vijeća roditelja učenika osnovnih i srednjih škola Kantonu Sarajevo, a u vezi sa njihovim zahtjevom za informacije o razlozima onemogućavanja realizacije projekta škola u prirodi. Radi se o dugogodišnjem projektu koji je prepoznat i u zakonu i koji se do sada evo godinama realizirao u objektu škole u Šabićima na Bjelašnici i lično sam zainteresovan za tu temu s obzirom da se bavim dijelom i neformalnim obrazovanjem kao starješina odreda izviđača Igman 92 i ove godine ni mi nismo bili u situaciji da svoje zimovanje koje organizujemo u Šabićima u tom objektu već desetak godina realizujemo i ove godine. Ovo vijeće roditelja kao što smo jučer informisani svih putem maila je prije nepuna 3 mjeseca poslalo zahtjev, još uvijek nisu dobili odgovor od nadležnog Ministarstva za odgoj i obrazovanje, odnosno od opštine Trnovo na kojoj se gradila i uz pomoć koje se gradio objekat u Šabićima odnosno njegova dogradnja. Lično sam bio u objektu. Znam da se radi o veoma kvalitetnom objektu, međutim nezvanično i usmenim putem smo informisani nekad u decembru prošle godine da objekat nema upotrebnu dozvolu i da

zbog toga on ne može biti u službi prije svega spomenutog Ministarstva ali i udruženja poput udruženja izvođača i drugih korisnika tog objekta. Znam da se radilo o milijunskim investicijama od prije nekoliko godina u dogradnju objekta i mislim da kako javnost tako Vijeće roditelja učenika osnovnih i srednjih škola u Kantonu Sarajevo, a i mi kao Skupština ovaj zaslužujemo i moramo dobiti informaciju šta se to ustvari desilo sa tim sa tim objektom i zbog čega on u ovom trenutku nije u upotrebi.“

Zastupnik Haris Zahiragić je podnio sljedeće (citiramo): „Imao bih jednu inicijativu i nekoliko pitanja. Inicijativa bi bila da se zadužuje Vlada Kantona Sarajevo da putem Ministarstva za visoko obrazovanje, nauku i mlade i Univerziteta u Sarajevu odmah i bez odlaganja izvrše zakonsku obavezu oslobođenja ili oslobađanja tj. povrata uplaćenih školarina studentima koji su postigli odgovarajući zakonom propisan uslov. Ja na svom inboks u službenog maila imam desetine mejlova prije svega studenata Stomatološkog fakulteta koji u kontinuitetu, zahvaljujući samovolji dekana Muhameda Ajanovića koji je postao ovdje i rektor i ministar i tutor vladajuće većine krši prava studenata na Stomatološkom fakultetu. Ako uzmemo u obzir činjenicu da je školarina na Stomatološkom fakultetu 8000 maraka, onda ćete razumjeti potrebu usvajanja ovakve inicijative. S obzirom da veliki broj kolega iz pozicije maše potvrdno glavom, vjerovatno iz razloga jer su dobili slične inicijative, ja tražim i očekujem, evo kolega Bandić, hvala, kolega Marjanović postavio pitanje očekujem da ćete podržati inicijativu i da one stvari koje mi usvojimo u Skupštini konačno budu poštovane, te da nijedan dekan, ni jedan interes, ni jedan pojedinac ne bude iznad zakona. Mislim da to studenti u Kantonu Sarajevo Univerziteta u Sarajevu kao glavnog i najstarijeg univerziteta države Bosne i Hercegovine dužni znati koja su njihova prava. Ako neko postigne uspjeh, a mi mu u Zakonu obećali oslobođenje, mislim da ne postoji razlog ni način da se bilo ko zbog finansijskih sredstava ili bilo čega drugog može tim povodom vaditi.

Tri pitanja koja bih postavio premijeru, prije svega to jeste pošto nema primjera Forte, v.d. premijerke Darije Softić i v.d. ministrici, s obzirom da je premijer podnio ostavku, ste vi sada v.d., jel? Da li je partokratija koju ste stavljali u svojim predizbornim sloganima činjenica da ste zaposlili Mersihu Kolčanović koja je bila na listi za Skupštinu Kantona Sarajevo, članicu Kantonalnog odbora Naše stranke za pomoćnika ministra visokog obrazovanja i da li je partokratija kada premijer Forte svog potpredsjednika Kantonalnog odbora po ugovoru o djelu angažuje u Vladi Kantona Sarajevo? Želim da mi odgovorite na ta pitanja. Inače, žao mi je zbog ljudi što ih spominjem, ali vi ste taj princip rada uveli u ove sale, pa "Ko se mača laća od mača i strada". Molim vas odgovorite mi jasno. I konačno pitanje za premijerku v.d. premijerku i za ministra MUP-a. Da li je na Ilidži prema operativnim saznanjima na sportskoj manifestaciji koja se održala incident koji je nastao od kojeg ste vi svojim prometnim odlaskom i porukama političkim koje ste s tog incidenta poslali napravili međunarodni skandal koji do dan današnji traje, što je rezultiralo da 7 mladih ljudi dobije pritvor mjesec dana, bio izazvan etničkom, nacionalnom ili drugom vrstom niskih pobuda, što bi onda moglo biti razumljivo zašto je takva reakcija javnosti bila ili je ipak ono što nam je načelnik policije kazao bio isprovocirani navijački incident i ukoliko jeste zanima me mišljenje ministra unutrašnjih poslova šta je rezultat pritvora od jednog mjeseca za 7 mladih ljudi što je 7 skoro godina života jel mladih ljudi koji možda jesu napravili grešku, ali ako uporedimo ostale počinjenja krivičnih djela, ako znamo obavezu, ako znamo obavezu podjednako izricanja sankcije, podjednako pristupa pravdi, onda moramo te teme odgovoriti jer ne mogu biti neke lakše tjelesne povrede teže od ubistava i teških tjelesnih povreda zbog kojih ljudi u Kantonu Sarajevo nažalost ne odlaze u pritvor.“

Zastupnik Irfan Čengić je podnio sljedeće (citiramo): „Ja imam jednu zastupničku inicijativu, mislim da smo svi u dosadašnjem radu, a posebno u prethodnom sazivu Skupštine Kantona Sarajevo uvidjeli da imamo velike nedostatke u našem Poslovniku koji je zaista stariji, mislim da je više od jednu deceniju dakle izvorni tekst usvojen. Predlažem da danas usvojimo zaključak za pokretanje izmjena i donošenja novog Poslovnika, a da se na narednoj sjednici nađe vaš prijedlog koji će predložiti kolegij radne grupe koja će imati zadatak da analizira nedostatke postojećeg Poslovnika,

napravi radni materijal novog, dostavi materijal svim zastupnicima i radnim tijelima, a nakon toga dostavi u skupštinsku proceduru nacrt Poslovnika koji će kasnije proći javnu raspravu i kako bi ta radna grupa u konačnici dostavila prijedlog Poslovnika. Vi u proteklom mandatu ste radili na novom Poslovniku i sigurno da taj tekst može poslužiti kao neki draft, radni materijal te radne grupe i sigurno će dosta posla time biti olakšano toj radnoj grupi. Uzimajući u obzir da za ovu inicijativu nisu potrebna ni financijska sredstva niti izjašnjenja Vlade već se tiče našeg internog rada Skupštine, ja tražim da se danas glasa o inicijativi a da se na narednoj sjednici Kolegij predloži radnu grupu odnosno ad hoc radno tijelo Skupštine Kantona Sarajevo koje će biti ovlašteni predlagач tog Poslovnika.“

Zastupnik Jasmin Šaljić je podnio sljedeće (citiramo): „Pokrećem inicijativu da se u Kalendaru obilježavanja značajnih datuma, događaja i ličnosti iz perioda odbrambeno - oslobodilačkog rata 92-95 godine na području Kantona Sarajevo uvrsti obilazak mezarja Aleja veterana Vlakovo radi odavanja počasti umrlim pripadnicima Armije Republike Bosne i Hercegovine i MUP-a Bosne i Hercegovine. Termin za posjetu delegacija Aleji veterana u Vlakovu može se uklopiti u postojeći kalendar u kolonu pod rednim brojem 2, 6, 9 i 32. Redni broj 2 je 1. mart Dan nezavisnosti, redni broj 6 je 6. april Dan sjećanja na poginule pripadnike MUP-a. Redni broj 9 je 15. april Dan Armije Republike Bosne i Hercegovine. Redni broj 32 je 1. septembar formiranja Prvog korpusa. Pod ovim rednim brojevima i datumima delegacije Vlade i Skupštine Kantona Sarajevo i ostali NVO udruženja obilaze mezarja Kovači, Spomen park Vraca, Spomen obilježju ubijenoj djeci opkoljenog Sarajeva, groblje Lav i Sveti Josip. Potrebno je samo dodati na ove datume obilježavanje i i obilazak Aleje veterana na Vlakovu eto da možemo na kraju tog dana odati počast umrlim pripadnicima Armije.

Druga inicijativa vezana je za demobilisane borce. Pokrećem inicijativu prema Vladi i Skupštini Kantona Sarajevo za izmjenu i dopunu Zakona o dopunskim pravima boraca/ branitelja Kantona Sarajevo na način da se izmijeni član 57 navednog Zakona u zagradi novčana egzistencijalna naknada u stavu 2 ovog Zakona na sljedeći način: "Pravo na novčanu egzistencijalnu naknadu može ostvariti demobilisani branilac do navršenih 57 godina života pod uslovom da je bio pripadnik Oružanih snaga najmanje godinu dana, da je prijavljen kao nezaposleno lice kod nadležne Službe za zapošljavanje Kantona prije podnošenja zahtjeva za ostvarivanje prava". Ostali tekst ovog stava ostaje nepromijenjen. Uvodi se novi stav 3 u člana 57 stav 3) koji glasi:"Zahtjev za ostvarivanje prava demobilisani branilac koji je bio zaposlen i ostao bez posla pod uslovima navedenim u stavu 2 može podnijeti nakon što mu istekne period primanja od Javne ustanove Službe za zapošljavanje Kantona Sarajevo koji ostvaruje po osnovu gubitka radnog mjesta 3 mjeseca, 6 ili 9 mjeseci. Stav 3) navedenog člana postaje stav 4. Samo ću kratko pojasniti. Tzn. da demobilisani branilac koji je imao posao, bude višak ili izgubi posao, prima naknadu zavisno od dužine staža 3 mjeseca, 6 mjeseci, da ne mora čekati na birou 20 mjeseci da bi aplicirao za nagradu egzistencijalnu, već da to može s danom prijavljivanja na Biro, da prijavi se na egzistencijalnu naknadu.

I imao sam jedno pitanje ustvari 2, ali jedno kolega Avdić jedno je pitanje iskoristio vezano za djecu u Šabićima pa da ne ponavljam, jedno zastupničko pitanje za MUP. Znači zastupničko pitanje upućeno Ministarstvu unutrašnjih poslova Sarajevo a vezano za činovanje pripadnika službenika Ministarstva. Da li je tačno da u protekle 4 godine nije bilo činovanja u MUP-u Kantona Sarajevo? I da li je tačno da ako bi iz nekog razloga ostali bez komesara dao ostavku da mi nemamo čovjeka koji ga može zamijeniti u ovom trenutku u Kantonu Sarajevo zbog činovanja?“

Zastupnica Mimirka Melank je podnijela sljedeće (citiramo): „Vladi Kantona Sarajeva upućuje inicijativu o proglašenju temeljnih institucija kulture Bosne i Hercegovine od posebnog značaja za Kanton Sarajevo. Ova se inicijativa odnosi na Zemaljski muzej Bosne i Hercegovine, Umjetničku galeriju Bosne i Hercegovine, Historijski muzej, Nacionalnu i univerzitetsku biblioteku Bosne i Hercegovine, Kinoteku Bosne i Hercegovine, Muzej književnosti i pozorišne umjetnosti i Biblioteku za slijepa i slabovidna lica Bosne i Hercegovine. Obrazloženje ću uputiti pismenim putem.“

Zastupnik Kemal Ademović je podnio sljedeće (citiramo): „Na sjednici Skupštine 28. 12. zajedno sa zastupnikom Rusmirom Pobrićem podnio sam inicijativu da s ciljem ublažavanja posljedica inflatornog udara najugroženijim kategorijama stanovništva u Kantonu Sarajevo izdvoji najveći mogući iznosi iz Budžeta Kantona Sarajevo a koji neće ugroziti stabilnost Budžeta, te raspodjeli najugroženijim kategorijama stanovništva: dugoročno nezaposlenim osobama, penzionerima, komunalnim radnicima, osoblju s najnižim primanjima u javnim ustanovama i oni s najnižim primanjima koji rade teške fizičke poslove. Obzirom da je Vlada kantona djelimično prihvatila ovu inicijativu ja nisam tražio izjašnjenje. Sada tražim da mi se da informacija o tome koliko i kome je sredstava Vlada Kantona izdvojila u skladu s ovom inicijativom?“.

Nakon iscrpljene liste prijavljenih za pitanja i inicijative, uslijedilo je obraćanje članova Vlade kako bi dali odgovore na pitanja za koja je tražen usmeni odgovor. Prvi se Skupštini obratio ministar privrede Adnan Delić, zatim ministar unutrašnjih poslova Admir Katica, ministrica za rad, socijalnu politiku, raseljena lica i izbjeglice Ivana Prvulović, ministrica za odgoj i obrazovanje Naida Hota-Muminović, ministrica pravde i uprave Darja Softić-Kadenić i ministar zdravstva Haris Vranić.

Nezadovoljstvo odgovorima iskazali su zastupnici: Haris Zahiragić, Faruk Selmanović i Muamer Bandić.

Obzirom da nije bilo više prijavljenih diskutanata, predsjedavajući je dao kratku pauzu i zamolio šefove klubova da se sastanu u sali za sastanke kako bi se dogovorili vezano za glasanje oko inicijativa koje su podnijeli zastupnici a o kojima se traži izjašnjenje na sjednici.

NASTAVAK NAKON PAUZE

U nastavku sjednice predsjedavajući je pozvao zastupnike da se izjasne o predloženim inicijativama zastupnika.

Inicijativa Kluba SDP-a

„za nastavak dijaloga Vlade KS i sindikata o načinu povećanja primanja radnika koji ta primanja ostvaruju iz Budžeta Kantona Sarajevo u 2023.godini.“

je usvojena jednoglasno (28 „ZA“).

Inicijativa zastupnika Harisa Zahiragića

„Skupština Kantona Sarajevo zadužuje Vladu Kantona Sarajevo da odmah i bez odlaganja tvrdi adekvatan program subvencija za energente plin, drva, pelet, Toplane u procentualnom iznosu koji prati rast inflacije, a imajući u vidu poskupljenja energenata i ukupnu inflaciju“.

je usvojena jednoglasno (28 „ZA“).

Inicijativa zastupnika Irfana Čengića

„prema Skupštini Kantona Sarajevo za donošenje novog Poslovnika Skupštine Kantona Sarajevo“.

je usvojena jednoglasno (28 „ZA“).

Deklaracija Kluba zastupnika SDA u Skupštini Kantona Sarajevo:

„Skupština Kantona Sarajevo, kao predstavničko tijelo Kantona u čijem sastavu je Glavni grad koji je bio 1425 dana pod opsadom, izražava zabrinutost i najoštrije osuđuje provokativno podizanje tri prsta od strane novoizabranog ministra sigurnosti države Bosne i Hercegovine Nenada Nešića ispred sjedišta institucija Bosne i Hercegovine, što je ponovio i u programu uživo na Javnom servisu.

Podsjećamo na činjenicu da su najstrašniji zločini koji su počinjeni za vrijeme agresije na Bosnu i Hercegovinu, a koji su kulminirali zločinom genocida, kao i četverogodišnjom opsadom Sarajeva i teroriziranje njegovih građana, počinjeni upravo uz upotrebu simbola podignuta 3 prsta, što je i dokazano brojnim sudskim presudama Međunarodnog suda za ratne zločine počinjene na području bivše Jugoslavije.

Podizanje tri prsta ispred zgrade institucija Bosne i Hercegovine, blizu mjesta na kojem su pale prve žrtve okupacije Sarajeva, od strane Ministra sigurnosti Bosne i Hercegovine, predstavlja provokaciju i svjesnu uvredu za sve žrtve agresije i zločina genocida, te ima za cilj narušavanje odnosa i destabilizaciju povjerenja između građana i naroda Bosne i Hercegovine, kao i kreiranje atmosfere straha, što najoštrije osuđujemo! “

je usvojena jednoglasno (28 „ZA“).

Prešlo se na realizaciju druge tačke dnevnog reda.

AD-2.

Prijedlog Odluke o davanju saglasnosti na Izmjene i dopune Finansijskog plana prihoda i izdataka Javne ustanove „Služba za zapošljavanje Kantona Sarajevo“ Sarajevo za 2022. godinu sa Odlukom o izvršavanju Izmjena i dopuna Finansijskog plana prihoda i izdataka Javne ustanove „Služba za zapošljavanje Kantona Sarajevo“ Sarajevo za 2022. godinu

Zastupnici su materijal za ovu tačku dobili u dopunskom materijalu i nisu smatrali da je potrebna uvodna riječ Predlagača.

Kako nije bilo prijavljenih za pitanja ili diskusiju, predsjedavajući je pozvao zastupnike da pristupe izjašnjavaanju o Prijedlogu odluke o davanju saglasnosti na Izmjene i dopune Finansijskog plana prihoda i izdataka Javne ustanove „Služba za zapošljavanje Kantona Sarajevo“ Sarajevo za 2022. godinu sa Odlukom o izvršavanju Izmjena i dopuna Finansijskog plana prihoda i izdataka Javne ustanove „Služba za zapošljavanje Kantona Sarajevo“ Sarajevo za 2022. godinu.

Skupština je jednoglasno (26 „ZA“) donijela ovu Odluku.

Realizacija tačke tri.

AD-3.

Prijedlog odluke o dopunama Odluke o usvajanju okvira za otkup imovine i naknade radi realizacije projekta izgradnje gradskih saobraćajnica u Kantonu Sarajevo

Zastupnici su materijal dobili u dopunskom materijalu. Uvodna izlaganja po ovoj tački podnio je direktor Direkcije za puteve KS, Selmir Kovač.

U otvorenoj diskusiji su učestvovali zastupnici Mahir Dević i Irfan Čengić.

Predsjedavajući je pozvao zastupnike da pristupe izjašnjavaњу o Prijedlogu odluke o dopunama Odluke o usvajaњу okvira za otkup imovine i naknade radi realizacije projekta izgradnje gradskih saobraćajnica u Kantonu Sarajevo.

Skupština je jednoglasno (25 „ZA“) donijela ovu Odluku.

Realizacija tačke četiri.
AD-4.

Prijedlog Zakona o izmjenama Zakona o šumama Kantona Sarajevo

Materijal je zastupnicima dostavljen uz poziv za sjednicu.

Predsjedavajući je pozvao predstavnika Predlagača da u skladu sa članom 158. stav 2) Poslovnika Skupštine Kantona Sarajevo da ukratko navede razloge za donošenje Prijedloga zakona po skraćenom postupku, no zastupnici su smatrali da isto nije potrebno.

Nakon glasanja konstatovano je da je Skupština jednoglasno (26 „ZA“) prihvatila prijedlog da se pretres Prijedloga zakona provede po skraćenom postupku.

Zastupnici su smatrali da nema potrebe za uvodnim izlaganjem po Prijedlogu zakona, te je predsjedavajući otvorio prostor za obraćanje radnih tijela.

Zastupnica Sanela Klarić se javila ispred Komisije za poljoprivredu, vodoprivredu i šumarstvo i prerađivačku proizvodnju iznijela stav Komisije, citiramo: “Nakon diskusije mi smo u skladu i sa dogovorom sa ministrom, a po sugestijama ovaj Šumarskog fakulteta u Sarajevu usvojili predloženi Zakon o izmjenama i dopunama Zakona o šumama u Kantonu Sarajevo uz uslov da se u roku od 24 mjeseca od usvajaња zakona zaduži Ministarstvo privrede Kantona Sarajevo da izračuna i odredi stopu naknade za svako ŠPP u skladu sa metodikom proizvodnje vrijednosti šuma te uz uslov da se u članu 10 Zakona o šumama Kantona Sarajevo i zadnjeg stava promijeni Pravilnik za izradu šumsko Privredne osnove kojim će biti propisana obavezna primjena metodike za utvrđivanje proizvodne vrijednosti šuma kod izrade nove ŠPO, sama primjena realizacije ŠPO obavezuje korisnika šuma da obračunava i uplaćuje naknadu za korištenje šuma. Ovdje se radi o metodiki, a ne pa paušalnom povećanju ovog postotka”.

U diskusiji koja je potom otvorena učestvovali su zastupnici: Marijela Hašimbegović, Mahir Dević, Muamer Bandić, Haris Zahiragić i Jasmin Šaljić, kao i ministar privrede Adnan Delić.

Po zaključenju diskusije predsjedavajući je pozvao zastupnike da se izjasne o Prijedlogu Zakona o izmjenama Zakona o šumama Kantona Sarajevo.

Skupština je jednoglasno (20 „ZA“) usvojila Prijedlog Zakona o izmjenama Zakona o šumama Kantona Sarajevo.

U skladu sa najavom s početka sjednice a zbog održavanja sjednice Doma naroda Federalnog parlamenta, predsjedavajući je zaključio rad na Trećoj radnoj sjednici.

Broj: 01-04-866/23
27.01.2023.godine
SARAJEVO

Zapisnik izradila:

Lejla Kadrić

S E K R E T A R

SKUPŠTINE KANTONA SARAJEVO

Aida Zeković

P R E D S J E D A V A J U Ć I

SKUPŠTINE KANTONA SARAJEVO

Elvedin Okerić

ZAPISNIK
O RADU NASTAVKA TREĆE RADNE SJEDNICE SKUPŠTINE KANTONA SARAJEVO
ODRŽANE 18.04.2023.GODINE SA POČETKOM RADA U 09,00 SATI

Treću radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici je prilikom otvaranja prisustvovalo 30 zastupnica i zastupnika, tokom sjednice se priključio još jedan zastupnik, kako slijedi:

SDA - STRANKA DEMOKRATSKE AKCIJE

1. Dević Mahir
2. Izetbegović Sebija
3. Kalem Adi
4. Kapidžić Faruk
5. Selmanović Faruk
6. Viteškić Smiljana
7. Zahiragić Haris

POLITIČKA ORGANIZACIJA "NAROD I PRAVDA"

1. Čampara Aljoša
2. Kristić Danijela
3. Mehmedagić Mersiha
4. Memić Arijana
5. Okerić Elvedin
6. Pobrić Rusmir
7. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čengić Irfan
3. Čičić Davor
4. Kapo Belma
5. Pekić Jelena

POLITIČKA ORGANIZACIJA GRAĐANA "NAŠA STRANKA"

1. Bešlija Vildana
2. Handžić Vibor
3. Melank Miomirka

STRANKA ZA BOSNU I HERCEGOVINU

1. Bandić Muamer
2. Gaković Elza
3. Gavrankapetanović-Smailbegović Fatima

4. Šaljić Jasmin

DEMOKRATSKA FRONTA

1. Zuhrić Albin
2. Hašimbegović Marijela
3. Pilav Ilijaz
4. Vujović Vedrana

POLITIČKA ORGANIZACIJA/INICIJATIVA “ZA NOVE GENERACIJE”

1. Marjanović Damir

Izostanak sa ove sjednice opravdale su zastupnice Hodžić Admela i Klarić Sanela.

Nakon intoniranja državne himne, predsjedavajući je pozdravio zastupnice i zastupnike u Skupštini Kantona Sarajevo, članove Vlade Kantona Sarajevo, sve prisutne u sali, kao i predstavnike medija koji prate rad sjednice.

Zatim je podsjetio zastupnike da su na prethodnom zasjedanju koje je održano 27.01.2023. godine, razmatrane prve tri tačke i tačka 9. dnevnog reda, te da za nastavak preostaju sljedeće tačke:

4. Prijedlog Zakona o izmjeni Zakona o pružanju besplatne pravne pomoći-skraćeni postupak;
5. Prijedlog Zakona o izmjenama i dopuni Zakona o turizmu;
6. Prijedlog Zakona o komunalnoj policiji Kantona Sarajevo;
7. Prijedlog Zakona o uvjetima koje treba ispunjavati Kantonalna bolnica;
8. Nacrt Zakona o sportu Kantona Sarajevo;
10. Prijedlog Odluke o proglašenju temeljnih udruženja kulture naroda Bosne i Hercegovine od posebnog interesa za Kanton Sarajevo;
11. Prijedlog Odluke o davanju saglasnosti za zaključivanje Ugovora o poklonu između HOPE AND HOMES FOR CHILDREN Engleska, sa sjedištem u Sarajevu, ulica Himze Polovine br. 13 i Ministarstva za rad, socijalnu politiku, raseljena lica i izbjeglice Kantona Sarajevo, ulica Reisa Džemaludina Čauševića br. 1, kojim HOPE AND HOMES FOR CHILDREN Engleska poklanja nekretninu upisanu u Zemljišnoknjižnom uredu Općinskog suda u Sarajevu u ZK izvadku broj: 2994 K.O. SP_HRASNICA, k.č. 2876/98 u naravi stambena zgrada površine 95 m² i dvorište 215 m² ukupne površine 310 m², što odgovara upisu u katastarski operat PL broj: 1274 parcela broj 1942 K.O. Ilidža;
12. Prijedlog Odluke o prihvatanju zaduženja po Ugovoru o zajmu između Bosne i Hercegovine i Evropske banke za obnovu i razvoj (EBRD) za projekat „Tramvajska pruga Ilidža - Hrasnica“;
13. Prijedlog Odluke o izmjenama i dopunama Odluke o osnivanju Javne ustanove "Centar za napredne tehnologije u Sarajevu";
14. Nacrt privremene odluke o zaštiti izvorišta vode za piće “Sarajevsko polje”.

Realizacija tačke četiri.

AD-4.

PRIJEDLOG ZAKONA O IZMJENI ZAKONA O PRUŽANJU BESPLATNE PRAVNE POMOĆI- SKRAĆENI POSTUPAK.

Zastupnici su materijal dobili uz poziv za sjednicu. Predsjedavajući je pozvao predstavnika Predlagača da u skladu sa članom 158. stav 2) Poslovnika Skupštine Kantona Sarajevo ukratko navede razloge za donošenje Prijedloga zakona po skraćenom postupku.

Premijer Nihad Uk je dao kratko obrazloženje, nakon čega je predsjedavajući zamolio zastupnike da se izjasne da li će pretres Prijedloga zakona o izmjeni Zakona o pružanju besplatne pravne pomoći provesti po skraćenom postupku.

Na osnovu rezultata glasanja, predsjedavajući je konstatovao je da je Skupština jednoglasno (26 „za“) prihvatila da se pretres Prijedloga zakona provede po skraćenom postupku.

Zatim je premijer Nihad Uk podnio uvodno izlaganje o Prijedlogu zakona o izmjeni Zakona o pružanju besplatne pravne pomoći, nakon čega nije bilo prijavljenih za postavljanje pitanja ili diskusiju, te je predsjedavajući pozvao zastupnike da se izjasne o istom.

Na osnovu rezultata glasanja, predsjedavajući je konstatovao da je Zakon o izmjeni Zakona o pružanju besplatne pravne pomoći dobio jednoglasnu podršku (24 „za“ i bez glasova „protiv“ i „suzdržanih“).

Realizacija tačke pet.

AD-5.

PRIJEDLOG ZAKONA O IZMJENAMA I DOPUNI ZAKONA O TURIZMU

Prije otvaranja ove tačke riječ je zatražio premijer Kantona Sarajevo, Nihad Uk i obavijestio zastupnike da zbog usklađivanja stavova i dodatnih provjera koje moraju uraditi resorna ministarstva povlači sljedeće tačke s dnevnog reda:

Tačku 5. Prijedlog Zakona o izmjeni i dopuni Zakona o turizmu,

Tačku 6. Prijedlog Zakona o komunalnoj policiji Kantona Sarajevo,

Tačku 7. Prijedlog Zakona o uvjetima koje treba ispunjavati Kantonalna bolnica,

Tačku 8. Nacrt zakona o sportu Kantona Sarajevo

Tačku 14. Nacrt privremene odluke o zaštiti izvorišta vode za piće „Sarajevsko polje“.

Realizacija tačke deset.

AD-10.

PRIJEDLOG ODLUKE O PROGLAŠENJU TEMELJNIH UDRUŽENJA KULTURE NARODA BOSNE I HERCEGOVINE OD POSEBNOG INTERESA ZA KANTON SARAJEVO

Zastupnici su dobili materijale uz poziv za sjednicu. Uvodnu riječ u ime Predlagača je podnio ministar kulture i sporta, Kenan Magoda.

Obzirom da nije bilo prijavljenih zastupnika za postavljanje pitanja ili diskusiju, predsjedavajući je pozvao zastupnike da se izjasne o Prijedlogu odluke o proglašenju temeljnih udruženja kulture naroda Bosne i Hercegovine od posebnog interesa za Kanton Sarajevo.

Na osnovu rezultata glasanja, predsjedavajući je konstatovao da je Odluka o proglašenju temeljnih udruženja kulture naroda Bosne i Hercegovine od posebnog interesa za Kanton Sarajevo dobila jednoglasnu većinu (26 „za“ i bez glasova „protiv“ i „suzdržanih“).

Realizacija tačke jedanaest.

AD-11.

PRIJEDLOG ODLUKE O DAVANJU SAGLASNOSTI ZA ZAKLJUČIVANJE UGOVORA O POKLONU IZMEĐU HOPE AND HOMES FOR CHILDREN ENGLSKA, SA SJEDIŠTEM U SARAJEVU, ULICA HIMZE POLOVINE BR. 13 I MINISTARSTVA ZA RAD, SOCIJALNU POLITIKU, RASELJENA LICA I IZBJEGLICE KANTONA SARAJEVO, ULICA REISA DŽEMALUDINA ČAUŠEVIĆA BR. 1.

Zastupnici su materijal dobili uz poziv za sjednicu. Uvodno izlaganje je podnijela ministrica za rad, socijalnu politiku, raseljena lica i izbjeglice, Enda Pavić-Pečenković.

Nije bilo prijavljenih zastupnika za pitanja ili diskusiju, te je predsjedavajući pozvao zastupnike da se izjasne po prijedlogu ove Odluke.

Na osnovu rezultata glasanja, predsjedavajući je konstatovao da je Odluka o davanju suglasnosti za zaključivanje Ugovora o poklonu između HOPE AND HOMES FOR CHILDREN Engleska, sa sjedištem u Sarajevu, ulica Himze Polovine br. 13 i Ministarstva za rad, socijalnu politiku, raseljena lica i izbjeglice Kantona Sarajevo, ulica Reisa Džemaludina Čauševića br. 1, kojim HOPE AND HOMES FOR CHILDREN Engleska poklanja nekretninu upisanu u Zemljišnoknjižnom uredu Općinskog suda u Sarajevu u ZK izvadku broj: 2994 K.O. SP_HRASNICA, k.č. 2876/98 u naravi stambena zgrada površine 95 m² i dvorište 215 m² ukupne površine 310 m², što odgovara upisu u katastarski operat PL broj: 1274 parcela broj 1942 K.O. Ilidža dobila jednoglasnu većinu (29 „za“ i bez glasova „protiv“ i „suzdržanih“).

Realizacija tačke dvanaest.

AD-12.

PRIJEDLOG ODLUKE O PRIHVATANJU ZADUŽENJA PO UGOVORU O ZAJMU IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ (EBRD) ZA PROJEKAT „TRAMVAJSKA PRUGA ILIDŽA - HRASNICA“

Zastupnici su materijal dobili uz poziv za sjednicu. Uvodno izlaganje u ime Predlagača je podnio ministar finansija, Emir Dedović.

Pitanje je postavio zastupnik Haris Zahiragić, a odgovor mu je ponudio ministar finansija Emir Dedović.

U diskusiji koja je potom otvorena učestvovali su sljedeći zastupnici: Haris Zahiragić i Samir Avdić.

Zastupnik Mahir Dević je poslovničkom intervencijom tražio pauzu od 15 minuta u ime Kluba SDA, nakon čega je predsjedavajući zamolio da to bude po zaključenju diskusija, s čim se zastupnik složio.

Replike i ispravke krivog navoda su imali zastupnici: Haris Zahiragić, Samir Avdić i Muamer Bandić.

Zatim je predsjedavajući dao desetominutnu pauzu na zahtjev predsjednika Kluba SDA, Mahira Devića.

U nastavku, nakon pauze, učesnici u diskusiji su imali zastupnici: Faruk Kapidžić, Elvis Vreto, Muamer Bandić i Vildana Bešlija.

Replike i ispravke krivog navoda su imali zastupnici: Davor Čičić, Haris Zahiragić, Miomirka Melank, Samir Avdić, Faruk Kapidžić, Elvedin Okerić, Muamer Bandić, Mahir Dević i Vildana Bešlija.

Po zaključivanju diskusija, predsjedavajući je pozvao zastupnike da se izjasne o Prijedlogu odluke o prihvatanju zaduženja po Ugovoru o zajmu između Bosne i Hercegovine i Europske banke za obnovu i razvoj EBRD za projekat "Tramvajska pruga Ilidža-Hrasnica".

Na osnovu rezultata glasanja, predsjedavajući je konstatovao da je Odluka o prihvatanju zaduženja po Ugovoru o zajmu između Bosne i Hercegovine i Europske banke za obnovu i razvoj EBRD za projekat "Tramvajska pruga Ilidža-Hrasnica" dobila potrebnu većinu (22 „za“, 1 „protiv“ i 4 „suzdržana“ glasa).

Realizacija tačke trinaest.

AD-13.

PRIJEDLOG ODLUKE O IZMJENAMA I DOPUNAMA ODLUKE O OSNIVANJU JAVNE USTANOVE CENTAR ZA NAPREDNE TEHNOLOGIJE U SARAJEVU

Zastupnici su materijale dobili uz poziv za sjednicu. Uvodno izlaganje u ime Predlagača je podnio ministar privrede Zlatko Mijatović.

Pitanja predlagaču su postavili zastupnici: Damir Marjanović, Haris Zahiragić i Vedrana Vujović, nakon čega je predsjedavajući dao pauzu od pola sata kako bi ministar pripremio odgovore.

U nastavku nakon pauze ministar Zlatko Mijatović je ponudio odgovore zastupnicima.

U diskusiji koja je potom uslijedila učestvovali su zastupnici: Damir Marjanović i Haris Zahiragić.

Predsjedavanje sjednicom je preuzeo dopredsjedavajući Vibor Handžić.

Replicirao je zastupnik Damir Marjanović.

Nadalje su diskutovali zastupnici: Vedrana Vujović, Mahir Dević, Rusmir Pobrić i Haris Zahiragić.

Replike i ispravke krivog navoda su koristili zastupnici: Damir Marjanović, Mahir Dević i Elvis Vreto.

Dopredsjedavajući Vibor Handžić je po zaključivanju rasprave pozvao zastupnike da se izjasne o Prijedlog odluke o izmjenama i dopunama Odluke o osnivanju Javne ustanove Centar za napredne tehnologije u Sarajevu.

Na osnovu rezultata glasanja, dopredsjedavajući Vibor Handžić je konstatovao da Odluka o izmjenama i dopunama Odluke o osnivanju Javne ustanove Centar za napredne tehnologije u Sarajevu dobila potrebnu većinu (18 „za“, 2 „protiv“ i 7 „suzdržanih“ glasova).

Zastupnik Mahir Dević je izrazio sumnju u glasanje i zahtijevao pojedinačno izjašnjavanje zastupnika.

Nakon pojedinačnog izjašnjavanja koje je provela sekretarka Skupštine, Aida Zeković, dopredsjedavajući Vibor Handžić je konstatovao da je Skupština većinom glasova (18 „za“, 2 „protiv“ i 7 „suzdržanih“ glasova) donijela Odluku o izmjenama i dopunama Odluke o osnivanju Javne ustanove Centar za napredne tehnologije u Sarajevu.

Po zaključivanju ove tačke dnevnog reda dopredsjedavajući Vibor Handžić je konstatovao da je dnevni red ove sjednice iscrpljen, te je zaključio sjednicu i zahvalio na saradnji.

* * *

Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo

Broj: 01-04-866/23
18.04.2023.godine
SARAJEVO

Zapisnik izradila:

Lejla Kadrić

SEKRETAR
SKUPŠTINE KANTONA SARAJEVO

Aida Zeković

PREDSEDAVAJUĆI
SKUPŠTINE KANTONA SARAJEVO

Elvedin Okerić